

Bourges, 27. März 1555

Von Franciscus Duarenus

Abschrift: UB Leiden, BPL 191 BU, fol. 19r-v.

Hieronymo Wolfio.

Lectis non sine voluptate literis quas ad lectissimum adolescentem Raphaëlem Seilerum de me nuper scripsisti, facere non potui, mi Hieronyme, quin has ad te primo quoque tempore darem. Quum enim ex literis tuis, quantum mea causa cupias, et quam de me honorificè sentias, planè perspexerim, arbitratus sum officij mei esse, qui aliud tibi rependere nihil possim, hac saltem epistola gratum erga te animum meum benevolentiamque ostendere. Itaque pro ista tua in me voluntate et studio gratiam tibi quam maximam habeo: nec mihi quicquam antiquius est, quam vt aliquando referre oblata occasione possim. Interim te rogo vt quod vltro nullis meis prouocatus officijs humaniter ac liberaliter facere coepisti, in eo cunctanter perseueres, nec susceptam de me cogitationem curámque deponas. Nam etsi de migratione nihil adhuc constitutum habeo, tamen vereor vt diu consistere hic mihi liceat. Quid queris? aueo, ita me deus amet, exire vbi nec Pelopidarum. Quid dicam, aut potius quid taceam, intelligere te arbitror: nec mihi liberum aut tutum est omnia literis committere. Demosthenem tuum etiam nunc à te limatiorem prodire magnopere letor: qui vtinam ad nos maturè perueniat. Vale. Auarici Biturig[orum] festinanter in maximis occupationibus meis. 6 Cal[endas] April[is] 1555.